

「疫境有情」故事 / 廣播劇創作比賽 2021

主辦：戲劇教育發展基金 及 香港教師戲劇會

協辦：香港創意教育工作者協會

過去一年，新型冠狀病毒疫情反覆不定，香港市民同心抗疫，處處可見人間有情。有見及此，本會舉辦《「疫境有情」故事／廣播劇創作比賽 2021》，誠邀中、小學生創作故事或廣播劇，以記錄香港的時代回憶和疫情下的動人情節。盼望教師鼓勵學生參與是項能激發學生創意潛能，且饒有意義的活動。

小學組冠軍

學校：保良局何壽南小學

學生：李泓希 方晞喬 邱明豪 李俊昇

劇目：良心老闆

劇本全文

第一場（2021年1月4日，龍鳳酒樓）

（背景音樂）

1. 旁白：自從疫情爆發以嚟，香港嘅經濟受到嚴重嘅打擊。唔少公司同店舖都面對財政困難，甚至倒閉。陳先生喺龍鳳酒樓工作，係一名侍應，負責接待客人。有一日，佢同同事都畀老闆叫到去會議室。

（背景音樂停，換上腳步聲）

2. 員工陳先生：（疑惑地）老闆，我哋嚟齊啦。
3. 老闆：（語氣沉重地）阿陳，今日，唉！我要同大家宣佈一個壞消息，就係……疫情開始到而家，酒樓生意大跌八成，日日蝕錢，三位股東實在再撐唔到落去啦，下個月酒樓就要執笠喇！
4. 所有員工：（驚訝地）吓！我地點算呀！

第二場（2021年1月4日，員工陳先生家）

（背景音樂）

5. 旁白：陳先生放工之後就返屋企喇，佢當時嘅心情跌到落谷底呀，因為失業就代表冇收入，冇錢去應付屋企嘅開支。

（開門聲，關門聲，腳步聲）

6. 陳先生：（失落地）我返嚟喇。

7. 女兒：（興奮地）爸爸，你返嚟啦！我好掛住你呀！
8. 陳先生：（假裝高興，放下背包）係咩？我都好掛住你！
（背景音樂）
9. 旁白：陳先生食完晚飯之後，老婆睇見佢好似有心事嘅樣，就問佢發生乜嘢事。
（收拾碗筷的聲音）
10. 妻子：（好奇地）老公，點解你有嚟心機嘅？
11. 陳先生：（失落）唉！老闆話酒樓要執笠，所以我失業喇！
12. 妻子：（驚訝地）吓？乜嘢話？你講真㗎？
13. 陳先生：（憂心忡忡地）真㗎！我而家煩緊點樣維持生計。
14. 妻子：（無奈地）我賣埋啲珠寶首飾囉。
15. 陳先生：（感到非常愁煩）賣埋啲珠寶首飾，都只係可以勉強應付幾個月，而家最緊要係快啲搵返份工。
16. 妻子：（非常擔心）但係你年紀唔細啦，加上而家經濟蕭條，搵工難上加難㗎！

第三場（2021年1月5日，龍鳳酒樓）

（背景音樂）

17. 旁白：第日一朝早，陳先生同平時一樣去返工。
18. 陳先生：（垂頭喪氣）老闆，早晨！
19. 老闆：（獨白）睇住一班員工垂頭喪氣嗰個樣，我真係好唔忍心呀！
（關門聲）
20. 員工乙：（哭著）老闆，嗚……嗚……我老婆已經失咗業成年，過去一年嚟，都係靠我份糧供樓同養家，如果連我都失埋業的話，我都唔知點算呀！
（背景音樂）
21. 旁白：老闆知道員工嘅苦況之後，就一直係心裏面諗，究竟點樣可以幫到員工呢……
22. 老闆：（獨白，非常苦惱）我應該點樣做，先至可以保住員工嘅飯碗呢？……（計算代價）酒樓冇生意啫，我可以用第二啲方法搵錢返嚟交租㗎……西貢間別墅我都好少人去住嘅，可以賣咗佢呀……泊喺愉景灣嗰艘遊艇，其實都可以賣咗佢㗎，而家我年紀大咗，都甚少出海喇……仲有啲金錶等等，全部都係身外物，賣咗去，第日可以買得返。但係如果執咗間酒樓，就要遣散晒呢班一齊共事咗幾十年嘅忠心員工囉㗎。我同員工之間嗰份深厚嘅手足之情，係用錢買唔到嘅。（堅定不移）好！為咗員工，我犧牲一啲，又算得係乜嘢呀！
（背景音樂）
23. 旁白：於是，老闆再一次將員工叫去會議室，同佢哋宣布一件大事。

24. 員工丙：（低沉地）老闆，係咪要遣散我哋呀？
25. 老闆：（嚴肅地）各位，為咗保住大家嘅飯碗，我決定咗，變賣自己一部分嘅資產，用嚟交舖租同出糧，我希望同大家一齊，共渡時艱，亦都希望各位能夠一齊努力，諗辦法控制成本，提高營業額。如果能夠令酒樓渡過呢一個經濟寒冬的話，酒樓唔使執笠，大家就唔使咁徬徨啦！
26. 全體員工：（興奮地）老闆，多謝你！你真係一個好老闆！
27. 員工丙：係呀！係呀！
28. 全體員工：我哋一定會諗辦法提升營業額㗎！
29. 老闆：（激勵士氣）好！我哋一齊加油！
30. 所有員工：（士氣高昂地）加油！加油！加油！
- （背景音樂）
31. 旁白：後來，所有員工群策群力，諗出各種辦法，包括推出優惠套餐、抗炎菜式、健康湯水、外賣飯盒等等。結果，酒樓營業額真係提升咗唔少，賺返嚟嘅錢足夠酒樓開支，員工唔使擔心裁員，大家都好開心！呢個故事話畀大家聽，只要香港人上下一心，和衷共濟，共渡時艱，一定可以走出疫情嘅陰霾，重見曙光。

（完）



小學組冠軍聲演：保良局何壽南小學